

Protocol no. 19
Sezzüda da mardi, 22 mai 2012 – 08.30 – 12.00

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)
Mario Riatsch per las tractandas 131 e 132

Protocol

Il protocol no. 18 da la sezzüda da lündeschdi, 7 mai 2012 vain approvà.

131 810 ADMINISTRAZIUN FORESTALA
Dons causa naiveras e vent 2012

Per quista tractanda es gnü invidà nos silvicultur Mario Riatsch chi rapporta sur dals dons chaschunats causa las naiveras in schner e causa il vent la fin d'avrigl i'ls gods sül territori dal cumün da Sent. El spiega cha'ls dons sajan considerabels e chi hajan stuvü gnir fats tagls sforzats da raduond 5325 m3. Per pudair rumir ils gods da tuot quista laina croudada a temp ütil sun gnüdas surdattas diversas lavurs ad interpraisas cun üna mechanisaziun specialisada, uschè cha bainquanta bos-cha devastada es fingià rumida. Furtünadamaing pon tals dons gnir annunzchats a l'uffizi da god chantunal chi prevezza per dons i'ls gods da protecciun sco eir illa circumferenza d'ün kilometer da tals sustegns finansials. Per raduond 4'800 m3 laina dals tagls sforzats es avantman la conferma pel subsidi davart dal chantun, per ulteriurs 500 m3 esa fat la dumonda per subsidi. Üna bella part da la laina ha pudü gnir vendüda sco laina d'adöver pel predschesch dal marchà. Il rest vain vendü sco laina da fö o sco s-chalizzas.

132 830 TURISSEM
Punts penduossas Val Sinestra

Sco protocolà fingià als 11 schner 2012 ed als 29 favrer 2012 nu correspuondan las punts penduossas in Val Sinestra staticamaing a las normas da sgürezza pretaisas per l'adöver da las punts sur tuot on. L'inviern passà sun las punts gnüdas donnagiadas fermamaing e nu sun plü transiblas. Causa cha'l traiget da l'hotel Val Sinestra fin aint a Zuort es bain frequentà e causa cha las punts sün quist traiget valan sco attracziun turistica da la regiun, füssa fich puchà da tillas stuvair levar per adüna. Il Cussagl cumünal es da l'avis cha quistas punts stuvesse gnir mantgnüdas. Our da quel motiv as es in tschercha d'üna soluziun finanziaria chi permettesse üna sanaziun totala da las punts da maniera cha las punts correspundessan per finir plainamaing a las pretaisas staticas per l'adöver da tuot on. Causa cha tal proget nu sarà realisabel uschè svelto ed in vista cha'l traiget fin aint a Zuort stuvesse esser transibel fingià per la stagiun da stà, decida il Cussagl cumünal d'incumbenzer il silvicultur insembel culla gruppa da god e cun sustegn d'ün perit competent, da metter darcheu ad ir las punts da möd ch'ellas correspuondan a la norma da sgürezza per l'adöver d'ürant la stà. Quist provisorium vain mantgnü fin cha'l proget per la sanaziun da las punts es pront e finanziabel e po gnir realisà. Il temp pel provisorium sto però esser limità. Il provisorium vain dat liber davart dal cumün pür cur cha las pretaisas a regard la sgürezza per l'adöver d'ürant la stà es garanti.

133 860.318.04 Città d'energia
Contribuziun dal cumün vi d'abunamaints dal trafic public

Per animar als abitants da Sent da far adöver dal trafic public as partecipescha il cumün daspöls 1. schner 2011 cun üna contribuziun da 50% vi dals cuosts dals abunamaints da traget Sent-Scuol. La cumischiun d'energia ha uossa constattà cha eir persunas chi douvran il trafic public per ir a lavur ma chi han ün abunamaint general stuvevan profitar da quista sporta. Il Cussagl cumünal decida perquai cha persunas cun abunamaints generals (GA o BüGA) han il dret da survgnir il glistess rimbours sco'ls possessurs dals abunamaints da traget Sent-Scuol, q.v.d. 50% dal predsch d'ün abunamaint da traget Sent-Scuol. Pel rimbours ston els però muossar sü sper l'abunamaint general eir amo ün contrat da lavur d'almain 50% causa cha la sporta es previsa impustüt sco intimaziun da dovrar invezza dal trafic individual ils mezs publics per ir a lavur. Quista decisiun vain comunichada aint il prossem mas-chalch.

134 720.434.02 Deponia La Fuorcha
Müdamaint da l'avertüra da la Fuorcha

Tenor il permiss concess da l'uffizi per natüra ed ambient esa admiss da deponar be material inert sco terra, crappa, s-chart d'üert e flus giò la deponia da la Fuorcha. Na admiss sun tuots aldüms, chargias fain e strom. Per frus-chaglia, rests da laina e patütsch es il deposit previs sül plazzal da la laina sur la deponia ingiò chi vain da temp in temp fat zappaditsch landroura. Displaschaivelmaing as sto constattar chi vain repetidamaing deponà tant gio la deponia da la Fuorcha sco eir sül plazzal da la laina material na admiss.

Eir la pratcha da dar oura üna clav per la deponia da la Fuorcha cunter ün deposit da fr. 100.-- nu cuntainta, causa chi vain adüna darcheu fat abüs da la sporta. Per avoir üna megltra survaglianza sur da la deponia da la Fuorcha decida il Cussagl las sequaintas masüras:

- I nu vegnan dattas oura plü ingünas clavs per la deponia a persunas privatas. Persunas chi sun amo in possess d'üna clav da la fuorcha tilla stuvevan retuornar fin il plü tard als 6 gün 2012 uschiglö nu vain pajà inavò il deposit da fr. 100.--.
- Per pudair depositar material inert gio la deponia da la Fuorcha esa in avegnir necessari d'annunzchar ouravant in büro cumünal che material e quant material chi vain mis giò la deponia.
- La deponia vain in avegnir rivida d'ün lavuraint cumünal tenor las annunzchas in büro cumünal sequaintamaing:
il marcurdi da las 16.00 - 17.00 cun anunnzcha fin mardi 16.00
la sonda da las 16.00 - 17.00 cun annunzcha fin venderdi 16.00
Per deposits plü gronds as po cumbinar oters termins.

Quistas masüras vegnan comunichadas aint il prossem mas-chalch.

135 800 ALPS E PAS-CHS
Dumondas per alpagnar muvel ester dal 2012

Il schef d'alps e pauraia prelegia las dumondas da la società d'alps e chascharia Sent e da la società da vachas mamma Sent per pudair alpagnar muvel ester d'ürant la stà 2012. Il Cussagl cumünal decida da conceder il permis i'l rom dals ultims ons.

136 80

AGRICOLTURA

Funtana Taischna - Fops d'aua illa parcella da Legn Marsch

Tenor il schef da pauraria s'ha quista prümavaira stuvü constattar ter gronds fops d'aua illa parcella da Legn Marsch. I vain presümà chi's tratta d'üna part d'aua da la Funtana Taischna. Avant co trar masüras per sanar il let da l'aua da maniera cha l'aua nu va plü a perder, as vuless il prüm eruir scha l'aua deriva insomma da la Funtana Taischna. Per chattar oura quai as prova da culurir l'aua da la Funtana Taischna cun culur da vivandas per verer scha la culur riva illa parcella da Legn Marsch.

137 942

POSSESS DA FINANZAS D'EDIFIZIS

Spartziun stabilimaints cumünals

Il cumün da Sent es in possess da bainquants stabilimaints chi ston gnir custodits e survegliats. Il Cussagl cumünal decida da spartir la respunsabilità sur dals differents stabilimaints sùls seguints schefs:

- Andri Poo: clucher, chasa da scoula, sarinera, implant electric Sur En
- Dumeng Jann: lavuratori, chasa cumünala Misoc, scoulina e saletta in Centrala.
- Men Caviezel: chamonnas cumünalas, stabilimaint forestal Sur En

138 942.423.05

Fits per terrains cumünals

Chasa Veglia – Metter maisas sün terrain cumünal

L'ustera da la "Chasa Veglia" ha inoltrà la dumonda da pudair metter sù d'ürant ils mais da stà maisas sül terrain cumünal davant l'ustaria. Per quel scoppo stuvess la via chi collia Bügliet cun Avant Baselgia gnir serrada per quel temp. Ella motivescha l'intent cul fat cha tuot ils ulteriurs restaurants in cumün sajan serrats e cha'l lö in "Chasa Veglia" saja restret per servir a cuntantezza a tuot ils giasts chi vulessan ir inglur a mangiar a Sent. Al Cussagl cumünal es cuntschianta la problematica cha'ls giasts da Sent stà a disposiziun ün'unic restaurant per ir a mangiar. Our da quel motiv vuless il Cussagl cumünal spordscher man in quista situaziun e sustegner l'intent da l'ustera da la "Chasa Veglia". Pussibel füssa da spordscher il lö da la via sco eir las duos plazzas da parcar sper il tachometer. Tuot tenor saraja d'installar alch podest per gulivar oura la pendenza dal plazzal. La dumonda vain perquai trattada sco dumonda da fabrica cun procedura d'annunzcha cun las seguintas cundiziuns:

- I sto gnir inoltrà ün plan da situaziun cun disegnà aint las maisas.
- L'acconsentimaint dals vaschins sto gnir muossà sù.
- L'urari da gestiun per l'ustaria sün via vain limità sün las 22.00.
- Il permiss per metter maisas sün terrain cumünal es limità sülla stagiun da stà 2012
- La via tanter Bügliet ed Avant Baselgia vain serrada di e not d'ürant la stagiun da stà 2012.

139

ORIENTAZIUNS

Sanaziun da la senda dal Quar

In vista cha davart l'Intereg nun esa da preverer cun ün sustegn finanziel per la sanaziun da la senda dal Quar s'ha il capo insembel cul secretari da la PEB Reto Rauch miss in colliaziun cun l'uffizi da construcziun bassa dal Grischun. Tenor classa da finanzas dal cumün da Sent dessa eventualmaing la pussibilità da survgnir subsidi causa chi's tratta d'üna sanaziun per sgürar il traiget tant per peduns sco eir per bikers. Sco basa per pudair far üna dumonda da subsidi füssa d'inoltrar ün preproget. Il capo sclerischa cul svilupader regional Andrea Gilli schi dess da lur vart üna pussibilità per la finanziaziun dal preproget. Il cumün da Sent ha inoltrà il proget da la sanaziun dal Quar eir sco proget regional a la PEB.

L'actuara: